

宋

史

四



本紀卷第十

宋史

開府儀同三司上柱國贊國事前書奏表和殿修國史領經筵事都總裁賜號榮譽奉勅修

仁宗二

明道元年春二月癸卯呂夷簡上三朝寶訓丙午詔  
仕廣南者毋過兩任以防貪黷庚戌以張士遜同中  
書門下平章事集賢殿大學士戊午錄故宰臣孫並  
試將作監主簿甲子詔員外郎以上致仕者錄其子  
校書郎三丞以上齋郎丁卯以真宗順容李氏為宸  
妃是日妃薨三月戊子頒天聖編敕戊戌以江淮旱

遣使與長吏錄繫囚流以下減一等杖笞釋之己亥  
除婺秀州丁身錢夏四月丙午錄繫囚戊午知棣州  
王涉坐冒請官地為職田配廣南牢城五月癸酉遣  
使點檢河北城池器甲密訪官吏能否壬午廢杭秀  
二州鹽場秋七月丙申詔諸路轉運使舉國子監講  
官丁酉王曙罷太白晝見彌月乃減八月辛丑以晏  
殊為樞密副使丙午晏殊參知政事甲寅以楊崇勛  
為樞密副使辛酉授啗廝囉為寧遠大將軍愛州團  
練使壬戌大內火延八殿癸亥移御延福宮甲子以  
呂夷簡為脩內使乙丑詔羣臣直言闕失丁卯大赦

九月庚寅重作受命寶丙申皇太后出金銀器易左  
藏緡錢二十萬以助脩內冬十月庚子黃白氣五貫  
紫微垣丁巳詔漢陽軍發廩粟以振飢民十一月甲  
戌以脩內成恭謝天地于大安殿謁太廟大赦改元  
百官進秩優賞諸軍是日還宮己卯冬至率百官賀  
皇太后于文德殿御大安殿受朝壬辰延州言夏王  
趙德明卒癸巳以德明子元昊為定難軍節度使西  
平王十二月壬寅以楊崇勛為樞密使戊午詔獲劫  
盜者奏裁毋擅殺壬戌西北有蒼白氣亘天是歲京  
東淮南江東饑

二年春正月己卯詔發運使以上供米百萬斛振江淮飢民遣使督視二月戊戌含譽星見東北方庚子詔江淮民飢死者官為之葬祭乙巳皇太后服袞衣儀天冠饗太廟皇太妃亞獻皇后終獻是日上皇后尊號曰應元齊聖顯功崇德慈仁保壽皇太后丁未祀先農于東郊躬耕籍田大赦百官上尊號曰睿聖文武體天法道仁明孝德皇帝三月庚午加恩百官丁亥祈雨于會靈觀上清宮景德開寶寺庚寅以皇太后不豫大赦除常赦所不原者乾興以來貶死者復官謫者內徙甲午皇太后崩遺詔尊皇太妃為皇

太后呂夷簡為山陵使夏四月丙申朔出大行皇太  
后遺留物賜近臣壬寅追尊宸妃李氏為皇太后至  
是帝始知為宸妃所生甲辰以大行皇后五使並  
兼追尊皇太后園陵使戊申聽政于崇政殿西廂己  
酉罷乾元節上壽壬子詔臣僚宗戚命婦母得以進  
獻祈恩澤及緣親戚通表章罷創脩寺觀帝始親政  
裁抑僥倖中外大悅癸丑召還宋綬范仲淹丙辰內  
侍江德明等並坐交通請謁黜已未呂夷簡張耆夏  
竦陳堯佐范雍趙稹晏殊皆罷以張士遜為昭文館  
大學士李迪同中書門下平章事集賢殿大學士王

隨參知政事李諮為樞密副使王德用僉書樞密院  
事壬戌御紫宸殿以張士遜為山陵使兼園陵使癸  
亥上大行太后謚曰莊獻明肅追尊宸妃李氏為皇  
太后謚曰莊懿五月戊辰詔禮部貢舉癸酉詔中外  
勿輒言皇太后垂簾日事乙亥罷羣牧制置使丙子  
命宰臣張士遜撰謝太廟及躬耕籍田記檢討宋祁  
言皇太后謁廟非後世法乃止撰籍田記戊寅錄繫  
囚六月甲午朔日有食之壬寅錄周世宗及高季興  
李煜孟昶劉繼元劉鋹後癸卯命審刑大理詳定配  
隸刑名戊午減天下歲貢物秋七月丁丑詔知耀州

富平縣事張龜年增秩再任以其治行風告天下戊  
子詔以蝗旱去尊號睿聖文武四字以告天地宗廟  
仍令中外直言闕政八月甲午朔契丹使來弔慰祭  
奠壬寅作奉慈廟甲辰詔中外母避莊獻明肅太后  
父諱丁巳置端明殿學士九月甲戌幸法福院臨莊  
懿太后梓宮丙子壬午臨如之冬十月癸巳朔太白  
犯南斗甲午禁登州民采金丁酉祔葬莊獻明肅皇  
太后莊懿皇太后于永定陵甲辰詔以兩川歲貢綾  
錦羅綺紗以三之二易為紬絹供軍湏己酉祔莊獻  
明肅太后莊懿太后神主于奉慈廟癸丑下德音降

東西京囚罪一等徒以下釋之緣二太后陵應奉民戶免租賦科役有差丙辰贈周王祐為皇太子戊午張士遜楊崇勛罷以呂夷簡為門下侍郎同中書門下平章事昭文館大學士王曙為樞密使王德用為樞密副使宋綬參知政事蔡齊為樞密副使十一月癸亥朔薛奎罷詔增宗室奉太白犯南斗乙丑追冊羨人張氏為皇后甲戌贈寇準為中書令十二月丙申復置提點刑獄丁酉詔諸路轉運使副歲徧歷所部仍令州軍具所至月日以聞甲辰以京東飢出內藏絹二十萬代其民歲輸乙巳詔脩周廟丁未詔臺

官非中丞知雜保薦者勿任戊申出宮人二百乙卯  
廢皇后郭氏為淨妃王京冲妙仙師居長寧宮御史  
中丞孔道輔率諫官御史大呼殿門請對詔宰相告  
以皇后當廢狀丙辰出道輔及諫官范仲淹仍詔臺  
諫自今毋相率請對丁巳詔明年改元禁邊臣增置  
堡砦是歲畿內京東西河北河東陝西蝗淮南江東  
兩川飢遣使安撫除民租注輦國來貢

景祐元年春正月甲子發江淮漕米振京東飢民丙  
寅詔開府界諸縣作糜粥以濟飢民諸州傷寒軍  
亦如之戊辰詔三司鑄景祐元寶錢甲戌詔執政大

臣議兵農可更制者以聞詔募民掘蝗種給菽米癸未詔禮部所試舉人十取其二進士三舉諸科五舉嘗經殿試進士五舉年五十諸科六舉年六十及曾經先朝御試者皆以名聞甲申淮南飢出內藏絹千萬代其民歲輸丁亥置崇政殿說書庚寅詔停淮南上供一年二月乙未罷書判拔萃科辛丑詔禮部貢院諸科舉人七舉者不限年並許特奏名甲辰權減江淮漕米二百萬石戊申詔麟府州振蕃漢飢民三月壬午免諸路灾傷州軍今年夏稅癸未詔解州畊戶逋鹽蠲其半是月賜禮部奏名進士諸科及第出

身七百八十三人夏四月丁酉開封府判官龐籍言  
尚美人遣內侍稱教旨免工人市租帝為杖內侍仍  
詔有司自今宮中傳命毋得輒受矣。詔置殿中侍  
御史監察御史裏行五月辛酉出布十萬端易錢糴  
河北軍儲丁卯禁民間織錦刺繡為服飾西川歲織  
錦上供亦罷之癸酉詔臺諫未曾歷郡守者與郡壬  
午錄繫囚是月契丹主宗真之母還政於子出居慶  
陵六月壬辰交州民六百餘人內附庚子免畿內被  
災民稅之半己酉策制舉武舉人乙卯詔州縣官非  
理科決罪人至死者並奏聽裁閏月甲子泗州淮汴

溢己巳常州無錫縣大風發屋乙亥毀天下無額寺  
院壬午罷造玳瑁龜筒器秋七月丙申賜壽州下蔡  
縣被溺之家錢有差己亥樞密使王曙加同平章事  
辛丑詔文武提刑毋得互相薦論壬子詔轉運使與  
長吏舉所部官專領常平倉粟甲寅河決澶州橫隴  
埽八月庚申薛奎卒壬戌有星孛于張翼癸亥王曙  
卒甲子月犯南斗戊辰帝不豫庚午以王曾為樞密  
使辛未以星變大赦避正殿減常膳輔臣奏事延和  
殿閣壬申詔淨妃郭氏出居于外羨人尚氏入道楊  
氏安置別宅九月壬辰百官請隻日御前殿如先帝

故事詔可丁酉帝康復御正殿復常膳甲辰詔立皇后曹氏丙午熒惑犯南斗冬十月庚申罷淮南江浙荆湖制置發運使詔淮南轉運兼發運事乙亥作郊廟景安興安祐安之曲十一月己丑冊曹氏為皇后癸丑作大安之曲以饗聖祖十二月癸酉賜西平王趙元昊佛經是歲南平王李德政獻駢象二詔還之開封府淄州蝗

二年春正月癸丑置邇英延義二閣寫尚書無逸篇于屏二月戊午御延福宮觀大樂癸亥舊給事資善堂者皆推恩戊辰李迪罷以王曾為門下侍郎同中

書門下平章事集賢殿大學士王隨李諮知樞密院  
事蔡齊盛度參知政事王德用韓億同知樞密院事  
三月戊申出內庫珠賜三司以助經費夏四月庚午  
詔天下有知樂者所在薦聞五月甲午猺獠寇雷化  
州詔桂廣會兵討之丙申錄繫囚庚子議太祖太宗  
真宗廟並萬世不遷南郊升侑上帝以太祖定配二  
宗迭配丙午降天下繫囚罪一等杖以下釋之丁未  
廣西言鎮寧州蠻入寇六月丁巳詔幕職官初任未  
成考母薦乙亥頒一司一務及在京敷鎮寧蠻請降  
秋七月戊申廢西京採柴務以山林賦民官取十之

一八月壬子朔詔輕強盜法甲寅宴紫宸殿初用樂  
甲戌幸安肅門砲塲閱習戰已卯置提點刑獄鑄錢  
官九月壬寅按新樂己酉作睦親宅命中丞杜衍等  
汰三司胥吏宋綬上中書總例冬十月辛亥朔復置  
朝集院癸亥復羣牧制置使丁卯詔諸路歲輸繙錢  
福建二廣易以銀江東以帛庚午熒惑犯左執法十  
一月戊子廢后郭氏薨癸巳朝饗景靈宮甲午饗太  
廟奉慈廟乙未祀天地于圜丘大赦錄五代及諸國  
後宗室任諸司使以下至殿直者換西班官百官上  
尊號曰景祐體天法道欽文聰武聖神孝德皇帝丁

未加恩百官十二月壬子加喃廝囉為保順軍留後丙子詔長吏能導民脩水利闢荒田者賞之是歲以鎮戎軍荐飢貧弓箭手粟麥六萬石

三年春正月壬辰追復郭氏為皇后丁酉葬皇后郭氏二月丙辰命官較太常鐘律壬戌詔兩制禮官詳定京師士民服用居室之制甲子以廣南兵民苦瘴毒為置醫藥丁卯脩陝西三白渠三月癸巳復商賈以覓錢算請官茶法乙未觀新定鐘律戊戌詔兩省卿監刺史閭門以上致仕給奉如分司官長吏歲時勞賜之改維州為威州夏五月庚辰購求館閣逸書

丙申錄繫囚丙戌天章閣待制范仲淹坐譏刺大臣  
落職知饒州集賢校理余靖館閣校勘尹洙歐陽脩  
並落職補外詔戒百官越職言事六月壬申虔吉州  
水溢壞城郭廬舍賜被溺家錢有差秋七月丁亥禁  
民間私寫編敕刑書乙未置大宗正司庚子大雨震  
電太平興國寺災辛丑降三京罪囚一等徒以下釋  
之八月己酉班民間冠服居室車馬器用犯制之禁  
乙卯月犯南斗九月庚辰幸睦親宅宴宗室癸巳熒  
惑犯南斗是月定申心喪解官法冬十月丁未命章  
得象等考課諸路提刑甲寅作朝集院十一月戊寅

保慶皇太后楊氏崩辛卯上保慶太后謚曰莊惠十二月丙寅李誥卒丁卯王德用知樞密院事章得象同知樞密院事是歲南平王李德政西南蕃來貢南丹州莫淮戰內附

四年春正月壬午詔均諸州解額二月己酉葬莊惠皇后于永定陵己未祔神主于奉慈廟庚申德音降東西京及靈駕所過州縣囚罪一等徒以下釋之乙丑置赤帝像于宮中祈嗣三月甲戌置天章閣侍講戊寅詔禮部貢舉夏四月乙巳呂夷簡上景祐法寶新錄甲子呂夷簡王曾宋綬蔡齊罷以王隨為門下

侍郎同中書門下平章事昭文館大學士陳堯佐同  
中書門下平章事集賢殿大學士咸度知樞密院事  
韓億程琳石中立參知政事王鬷同知樞密院事五  
月庚戌皇子生錄繫囚降死罪一等流以下釋之是  
日皇子薨乙卯以旱遣使決三京繫囚丙寅芝生化  
成殿極六月乙亥杭州江潮壞隄遣使致祭戊子出  
神武祕略賜邊臣己丑奉安太祖御容于揚州建隆  
寺秋七月丁未詔河東河北州郡密嚴邊備戊申有  
星數百西南流至壁東大者其光燭地黑氣長丈餘  
出畢宿下八月甲戌越州水賜被溺民家錢有差甲

午詔三司轉運司毋借常平錢穀冬十一月癸亥罷  
登萊買金場十二月甲申并代忻州並言地震吏民  
壓死者三萬二千三百六人傷五千六百人畜擾死  
者五萬餘遣使撫存其民賜死傷之家錢有差是歲  
渭州民蠶成被長二丈五尺啞嘶囉龜茲沙州來貢  
寶元元年春正月甲辰雷丙辰以地震及雷發不時  
詔轉運使提舉刑獄按所部官吏除并代忻州壓死  
民家去年秋糧二月壬申詔復日御前殿甲午安化  
蠻寇宜融州三月戊戌朔王隨陳堯佐韓億石中立  
罷以張士遜為門下侍郎同中書門下平章事昭文

館大學士章得象同中書門下平章事集賢殿大學  
士王鬷李若谷並參知政事王博文陳執中同知樞  
密院事己亥發邵澧潭三州駐泊兵討安化州蠻是  
月賜禮部奏名進士諸科及第出身七百二十四人  
夏四月癸酉王博文卒乙亥以張觀同知樞密院事  
壬辰除宜融州夏稅五月乙巳錄繫囚六月戊寅罷  
舉童子已卯建州大水壞民廬舍賜死傷家錢有差  
其無主者官葬祭之甲申詔天下諸州月上雨雪狀  
秋七月壬戌策制舉入癸亥策武舉入八月丁卯復  
淮南江浙荆湖制置發運使庚辰熒惑犯南斗九月

戊申詔應祀事已受誓戒而失虔恭者毋以赦原賜  
宜融州討蠻兵繕錢冬十月丙寅詔戒百官朋黨十  
一月甲辰詔廣西鈐轄進兵討安化蠻乙巳詔宜融  
州民嘗從軍役者免今夏稅運糧者免其半戊申朝  
饗景靈宮己酉饗太廟及奉慈廟庚戌祀天地于圜  
丘大赦改元百官上尊號曰寶元體天法道欽文聰  
武聖神孝德皇帝乙卯復奏舉縣令法王曾薨十二  
月癸亥朔加恩百官甲子京師地震丙寅鄜延路言  
趙元昊反甲戌禁邊入與元昊互市己卯奉寧軍節  
度使知永興軍夏竦兼涇原秦鳳路安撫使振武軍

節度使知延州范雍兼鄜延環慶路安撫使是歲達  
州大水黎州蠻來貢

二年春正月己酉王隨卒辛亥安化蠻平癸丑趙元  
昊表請稱帝改元三月丁未鑄皇宋通寶錢乙卯閱  
試衛士戊午賜陝西緣邊軍士繙錢夏四月癸亥授  
唃廝囉二子瞎擅磨角檀團練使乙丑放宮女二百  
七十人壬申免昭州運糧死蠻寇者家徭一年賦租  
一年丁亥募河東陝西民入粟實邊五月癸巳詔近  
臣舉方略材武之士各二人己亥禁皇族及諸命婦  
女冠尼等非時入內癸卯命近臣同三司議節省浮

費丙午遣使體量安撫陝西河東已酉錄繫囚壬子  
王德用罷以夏守贊知樞密院事六月壬戌詔省浮  
費自乘輿服御及官掖所湏宜從簡約若吏兵祿賜  
毋槩行裁減戊辰詔諸致仕官嘗犯贓者毋推恩子  
孫丁丑益州火焚廬舍三千餘區壬午削趙元昊官  
爵除屬籍秋七月丁巳詔宗室遇南郊及乾元節恩  
許官一子餘五歲授官戊午以夏竦知涇州兼涇原  
秦鳳路沿邊經略安撫使涇原路馬步軍都總管范  
雍兼鄜延環慶路沿邊經略安撫使鄜延路馬步軍  
都總管八月丁卯以簞篋城唃廝波補本族軍主甲

戊皇子生丙子降三京囚罪一等徒以下釋之辛巳  
命輔臣報祠高祺九月壬寅詔河北轉運使兼都大  
制置營田屯田事乙卯出內庫銀四萬兩易粟振益  
梓利夔路飢民十月庚午賜麟府州及川陝軍士縉  
錢甲申詔兩川飢民出劒門關者勿禁十一月戊子  
朔出內庫珠易縉錢三十萬緡邊儲丁酉盛度程琳  
罷出御史中丞孔道輔壬寅以王鬷知樞密院事宋  
庠參知政事壬申詔御史闕員朕自擇舉是歲曹濮單州蝗  
賓客壬申詔御史闕員朕自擇舉是歲曹濮單州蝗

學田五十頃是月元昊寇延州執鄜延環慶兩路副都總管劉平鄜延副都總管石元孫詔陝西運使明鎬募強壯備邊三月丁亥以夏守贊為宣徽南院使陝西馬步軍都總管經略安撫使詔潼關設備辛卯月太白俱犯昴壬辰夏守贊兼沿邊招討使出內藏緡錢十萬賜戍邊禁兵之家知制誥韓琦安撫陝西白氣如繩貫日甲午括畿內京東西淮南陝西馬丙申詔諸路轉運使提刑訪知邊事者以聞丁酉詔樞密院同宰臣議邊事辛丑出內藏緡錢八十萬陝西市糴軍儲丙午德音釋延州保安軍流以下罪寇所

攻掠地除今夏稅成兵及戰死者賜其家繕錢是日  
改元去尊號寶元字許中外臣庶上封章言事丁未  
詔陝西量民力蠲所科芻糧癸丑降范雍為尚書吏  
部侍郎知安州甲寅出內庫珠償民馬直三月丙辰  
詔大臣條陝西攻守策癸亥命韓琦治陝西城池乙  
丑閱虎翼軍習戰辛未詔延州錄戰沒軍士子孫月  
給糧丙子大風晝暝是夜有黑氣長數丈見東南丁  
丑罷大宴詔中外言闕政戊寅王鬷陳執中張觀罷  
以晏殊宋綬知樞密院事王貽永同知樞密院事詔  
按察官舉才堪將帥者庚辰詔參知政事同議邊事

辛巳德音降天下囚罪一等徒以下釋之賜京師河  
北陝西河東諸軍緝錢蠲陝西夏稅十之二減河東  
所科粟夏四月丙戌省陝西沿邊堡砦已詔諸戍  
邊軍月遣內侍存問其家病致醫藥死為歛葬之甲  
午遣使籍陝西強壯軍乙未契丹國母復遣使來賀  
乾元節乙巳增補河北強壯軍丙午鄜延路兵馬都  
監黃德和坐棄軍要斬丁未贈劉平石元孫官錄其  
子孫辛亥築延州金明榜姥砦五月甲寅朔詔前殿  
奏事毋過五班餘對後殿命大官賜食壬戌張士遜  
致事呂夷簡為門下侍郎同中書門下平章事昭文

館大學士祭酉詔夏守贊進屯鄜州戊寅以夏竦為  
陝西馬步軍都總管兼招討使是月元昊陷塞門砦  
兵馬監押王繼元死之又陷安遠砦六月丙戌詔假  
日御崇政殿視事如前殿丁亥以夏守贊同知樞密  
院事甲午降三京囚罪一等徒以下釋之乙未南京  
鴻慶宮神御殿火壬寅遣使體量安撫京東西甲辰  
增置陝西河北河東京東西弓手秋七月乙丑遣使  
以討元昊告契丹庚午閱諸軍習戰戊寅皇子昕為  
忠正軍節度使封壽國公八月戊戌禁以金箔飾佛  
像癸卯遣尚書屯田員外郎劉渙使貌川戊申夏守

贊罷以杜衍同知樞密院事辛亥詔范仲淹葛懷敏  
領兵驅逐塞門等砦蕃騎出境仍募弓箭手給地居  
之九月甲寅滑州河溢戊午李若谷罷以宋綬晁宗  
慈參知政事鄭戩同知樞密院事戊辰以晏殊為樞  
密使王貽永杜衍鄭戩並樞密副使甲戌詔使臣諸  
班諸軍有武藝者自陳辛巳閱諸軍習戰是月元昊  
寇三川砦都巡檢楊保<sub>吉</sub>之又圍師子定川堡戰士  
死者五千餘人遂陷乾溝乾河趙福三堡環慶路兵  
馬副都總管任福破白豹城冬十月乙未製銅木契  
傳信牌甲辰錄方略士六十一人授官有差十一月

壬戌有大星流西南聲如雷者三十二月癸未出內藏庫絹一百萬助蘥軍諸詔南京祠大火丙戌詔以常平緡錢助蘥軍儲癸卯宋綬卒戊申鑄當十錢蘥助邊費

本紀卷第十

七十三字

宋本名光

十六  
角質刊

卷之三

收大安寺文

大父

卷之三

收大安寺文

大父

本紀卷第十一

宋史十一

開封儀同司上贊錄靈國重事前書有表相襲修國史領經筵事都總裁殿賜榮等奉

勅修

仁宗三

慶曆元年春正月辛亥朔御大慶殿受朝已未加誦  
廸羅河西節度使壬申詔歲以春分祠高禩是月元  
昊請和二月己亥壽國公昕薨辛亥罷太宴京東西  
淮浙江南荆湖置宣毅軍甲辰詔臣僚受外任者母  
得因臨遣祈恩丙午京師雨藥是月元昊寇渭州環  
慶路馬步軍副總管任福敗于好水川福及將佐軍

士死者六千餘人三月庚戌朔修金隄乙卯詔止郡國舉人勿以邊機為名希求恩澤夏四月甲申以資政殿學士陳執中同陝西馬步軍都總管兼經略安撫公邊招討等使知永興軍詔夏竦仍判永興軍乙巳下德音降陝西囚死罪一等流以下釋之特支軍士縉錢振撫邊民被鈔略者親屬五月丁巳錄繫囚甲子出內藏緝錢一百萬助軍費乙丑追封皇長子為襄王賜名昉丁卯罷陝西經略安撫沿邊招討都監辛未宋庠鄭戩罷以王舉正叅知政事任中師任布為樞密副使詔夏竦屯軍鄜州陳執中屯軍涇州

癸酉閱試衛士六月壬辰詔陝西諸路總管司嚴邊  
備毋輒入賊界賊至則禦之乙巳詔近臣舉河北陝  
西河東知州通判縣令秋七月丙辰月掩心後星戊  
午月掩南斗壬戌置萬勝軍凡二十指揮是月元昊  
寇麟府州八月戊寅詔鄜延部署以兵援麟府甲申  
河北置場括市戰馬緣邊七州軍免括乙未毀潼關  
新置樓櫓庚子月掩歲星乙巳募民間材勇者補神  
捷指揮是月元昊寇金明砦破寧遠砦砦主王世亶  
兵馬監押王顯死之陷豐州知州王餘慶兵馬監押  
孫吉死之九月壬子命河東鑄大鐵錢乙亥復置義

倉冬十月甲午詔罷都部署分四路置使置陝西營  
田務已亥罷銅符木契是月修河北城池十一月壬  
子置涇原路強壯弓箭手丙辰發廩粟減價以濟京  
城民甲子朝饗景靈宮乙丑饗太廟奉慈廟丙寅祀  
天地于圜丘大赦改元蠲陝西來年夏稅十之二及  
麟府民二年賦租臣僚許立家廟功臣不限品數賜  
戟增天下解額弛京東八州鹽禁是月令江饒池三  
州鑄鐵錢十二月丙子加恩百官丁丑司天監上崇  
天萬年曆戊寅詔陝西四路總管及轉運使兼營田  
甲午置陝西護塞軍是歲湖南洞蠻知徽州楊通漢

貢方物

二年春正月丁巳復京師榷鹽法壬戌詔以京西閒  
田處內附蕃族無親屬者遣使河北募兵及萬人者  
賞之癸亥詔磨勘院考提點刑獄功罪為三等以待  
黜陟二月乙未詔河北強壯刺手背為義勇軍三月  
甲辰朔詔殿前指揮使兩省都知舉武臣才堪為將  
者丁巳杜衍宣撫河東辛酉晁宗慤罷已巳契丹遣  
蕭英劉六符來致書求割地是月賜禮部奏名進士  
諸科及第出身八百三十九人夏四月戊寅命御史  
中丞諫官較三司用度罷其不急者庚辰知制誥富

弼報使契丹五月辛亥錄繫囚壬子咸皇后及宗室  
婦郊賜之半甲寅詔三館臣僚上封事及聽請對丙  
辰詔醫官毋得換右職戊午建大名府為北京降河  
北州軍繫囚罪一等杖笞以下釋之乙丑罷左藏庫  
月進錢戊辰禁銷金為服飾是月契丹集兵幽州聲  
言來侵河北京東皆為邊備六月甲戌出內藏銀紬  
絹三百萬助邊費癸未以特奏名武藝人補三班丙  
戌置北平軍丙申閔蕃落將士騎射戊戌詔減省南  
郊臣僚賜與秋七月丙午任布罷丁未詔軍校戰沒  
無子孫者賜其家繕錢戊午大雨雹以呂夷簡兼判

樞密院事章得象兼樞密使晏殊加平章事癸亥富  
弼再使契丹詔京官告病者一年方聽朝癸八月丁  
丑策制舉人戊寅策武舉人試騎射甲申白氣貫北  
斗戊子出內藏庫緡錢十萬修北京行宮己亥遣使  
安撫京東督捕盜賊九月丙午呂夷簡改兼樞密使  
乙丑契丹遣耶律仁起劉六符持誓書來閏月戊戌  
罷河北民間科徭是月元昊寇定川砦涇原路馬步  
軍副都總管葛懷敏戰沒諸將死者十四人元昊大  
掠渭州而去冬十月庚戌敕陝西保捷軍甲寅遣使  
安撫涇原路丙辰知制誥梁適報使契丹戊午發定

州禁軍二萬二十人屯涇原庚申詔恤將校陣亡其妻女無依者養之宮中丙寅契丹遣使來再致誓書報徹兵十一月壬申黑氣貫北斗柄辛巳復都部署兼招討等使命韓琦范仲淹龐籍分領之甲申以泰山處士孫復為國子監直講是歲占城獻駒象三

三年春正月庚午朔封皇子曠為郢王辛未曠薨丙子減陝西歲市木三之一辛巳詔輔臣議蠲減天下賦役戊子詔錄將校死王事而無子孫者親屬辛卯置德順軍壬辰錄唐狄仁傑後癸巳元昊自名曩霄遣人來納款稱夏國二月丙午賜陝西招討韓琦范

仲淹龐籍錢各百萬辛酉立四門學三月壬申閣衛  
士武技戊子呂夷簡罷為司徒監脩國史與議軍國  
大事以章得象為昭文館大學士晏殊為集賢殿大  
學士並兼樞密使夏竦為樞密使賈昌朝叅知政事  
夏四月戊戌朔幸瓊林苑閱騎士癸卯遣保安軍判  
官邵良佐使元昊許封冊為夏國主歲賜絹十萬匹  
茶三萬斤甲辰以韓琦范仲淹為樞密副使乙巳詔  
夏竦還本鎮以杜衍為樞密使丙辰以春夏不雨遣  
使祠禱于嶽瀆甲子呂夷簡罷議軍國大事五月丁  
卯朔日有食之庚午錄繫囚戊寅詔諸路轉運使並

兼按察使歲具官吏能否以聞庚辰祈雨于相國寺  
會靈觀癸未置御史六員罷推直官丁亥置武學戊  
子雨己丑謝雨辛卯築欽天壇于禁中乙未近臣薦  
試方略者六人授官有差是月忻州地大震虎翼卒  
王倫叛于忻州六月甲辰詔諸路漕臣令所部官吏  
條茶鹽礮及坑治利害以聞秋七月辛未詔許二府  
不限奏事常制得敷陳留對丙子王舉正罷壬午罷  
陝西管內營田甲申命任中師宣撫河東范仲淹宣  
撫陝西乙酉獲王倫八月乙未朔命官詳定編敕戊  
戌詔諫官日赴內朝丁未以范仲淹叅知政事富弼

為樞密副使壬子白氣貫北斗魁癸丑韓琦代范仲淹宣撫陝西甲寅太白晝見戊午罷武學九月丁卯詔輔臣對天章閣戊辰呂夷簡以太尉致仕乙亥任中師罷丁丑詔執政大臣非假休不許私第受謁是月桂陽洞蠻寇邊湖南提刑募兵討平之冬十月丙午詔中書樞密同選諸路轉運使丁未詔縣令佐能根括編戶隱偽以增賦入者量其數賞之戊申詔二府同選諸路提刑甲寅復諸路轉運判官乙卯詔脩兵書壬戌詔二府領新定磨勘式甲子築永洛城是月光化軍亂討平之十一月丙寅上清宮火癸未詔

館職有闕以兩府兩省保舉然後召試補用丁亥更  
薦補法壬辰限職田是月五星皆在東方十二月乙  
巳桂陽監徭賊復寇邊丁巳大雨雪木冰河北雨赤  
雪交趾獻馴象五安化州蠻來貢

四年春正月庚午京城雪寒詔三司減價出薪米以  
濟之壬申西蕃磨擅角入貢乙亥荆王元儼薨辛卯  
太常禮儀院上新脩禮書及慶曆祀儀二月丙申出  
奉宸庫銀三萬兩振陝西饑民己酉白虹貫日甲寅  
罷陝西四路馬步軍都總管經略安撫招討使復置  
隨路都總管經略安撫招討使三月癸亥朔以旱遣

內侍祈雨辛未省廣濟河歲漕軍儲二十萬石乙亥  
詔天下州縣立學更定科舉法語在選舉志已卯出  
御書治道三十五事賜講讀官庚辰錄唐郭子儀後  
甲申免衡道州桂陽監民經徭賦劫略者賦役年夏  
四月丙申詔湖南民誤為征徭軍所殺者賜帛存撫  
其家丁酉宜州蠻歐希範叛詔廣西轉運銓轄司發  
兵討捕壬子以錫慶院為太學五月庚午錄繫囚壬  
申幸國子監謁孔子有司言舊儀止肅揖帝特再拜  
賜直講孫復五品服遂幸武成王廟又幸玉津園觀  
種稻乙亥撫州獻生金山丙子詔西川知州軍監罷

任未出界而卒者錄其子孫一人戊寅詔募人納粟振淮南饑乙酉忻州言地震有聲如雷丙戌曩霄遣人來復稱臣六月壬子降天下繫囚流徒罪一等杖笞釋之范仲淹宣撫陝西河東癸丑詔諸軍因戰傷廢停不能自存及死事之家孤老月給米人三斗秋七月戊寅封宗室德文等十人為郡王國公壬午月犯熒惑癸未契丹遣使來告伐夏國甲申夷人寇三江砦清井監官兵擊走之丙戌詔諸路轉運提刑察舉守令有治狀者八月辛卯命賈昌朝領天下農田范仲淹領刑法事甲午富弼宣撫河北戊戌命右正

言余靖報使契丹保州雲翼軍殺官吏據城叛庚子  
命右正言田况度視保州仍聽便宜行事丙午進宗  
室官有差戊午詔輔臣所薦官毋以為諫官御史九  
月辛酉保州平壬戌詔保州官吏死亂兵而無親屬  
者官為殯斂兵官被害及戰沒並優賜其家民田遭  
蹂踐者蠲其租癸亥以真宗賢妃沈氏為德妃婉儀  
杜氏為賢妃戊辰呂夷簡薨庚午晏殊罷乙亥遣使  
安撫湖南甲申以杜衍同中書門下平章事兼樞密  
使集賢殿大學士賈昌朝為樞密使陳執中叅知政  
事丁亥宴宗室太清樓射于苑中冬十月庚寅賜曩

霄誓詔歲賜銀絹茶綵凡二十五萬五千陳堯佐薨丙申命范仲淹提舉三館祕閣繕校書籍癸丑桂陽蠻降授蠻酋三人奉職十一月壬戌以西界內附香布為團練使己巳詔戒朋黨相訐及按察恣為苛刻文人肆言行恠者已卯改上莊穆皇后謚曰章穆莊獻明肅皇太后曰章獻明肅莊懿皇太后曰章懿莊懷皇后曰章懷莊惠皇太后曰章惠庚辰朝饗景靈宮辛巳饗太廟奉慈廟壬午冬至祀天地于圜丘大赦十二月壬辰加恩百官乙未封襄霄為夏國主丁酉詔州縣以先帝所賜七條相誨敕辛亥置保安鎮

戎軍榷場是歲黎州邛部川山前山後百蠻都鬼主  
牟黑來貢

五年春正月甲戌罷河東陝西諸路招討使乙亥復  
置言事御史丙子契丹遣使來告伐夏國還庚辰命  
知制誥余靖報使契丹癸未詔京朝官因被彈奏雖  
不曾責罰但有改移差遣並四周年磨勘乙酉范仲  
淹富弼罷丙戌杜衍罷以賈昌朝同中書門下平章  
事兼樞密使集賢殿大學士王貽永為樞密使宋庠  
參知政事吳育龐籍並為樞密副使二月辛卯詔罷  
京朝官用保任叙遷法又罷蔭補限年法壬辰曩霄

初遣人來賀正旦癸卯以久旱詔州縣毋得滯繫刑  
獄辛亥祈雨于相國天清寺會靈祥源觀癸丑桂陽  
監言唐和等復內寇乙卯謝雨三月己未詔大宗正  
勵諸宗子授經務學辛酉韓琦罷癸亥詔禮部貢舉  
甲子宜州蠻賊歐希範平庚午東方有黃氣如虹貫  
月甲戌詔監司按察屬吏毋得差官體量申詔陝  
西以曩宵稱臣降繫囚罪一等笞釋之邊兵第賜繩  
錢民去年逋負皆勿責蠲其租稅之半麟府州嘗為  
羌所掠除逋負租稅如之丙戌罷入粟補官夏四月  
丁亥朔司天言日當食陰晦不見錄繫囚遣官錄三

京囚辛卯叢霄初遣人來賀乾元節戊申章得象罷  
以賈昌朝為昭文館大學士陳執中同中書門下平  
章事集賢殿大學士兼樞密使庚戌以吳育叅知政  
事丁度為樞密副使五月己巳罷諸路轉運判官閩  
月丙午叢霄遣人來謝冊命六月丁卯減益梓州上  
供絹歲三之一紅錦鹿胎半之秋七月戊申以廣州  
地震八月庚午荆南府岳州地震九月庚寅詔文武  
官已致仕而舉官犯罪當連坐者除之辛卯以重陽  
曲宴近臣宗室于太清樓遂射苑中冬十月乙卯契  
丹遣使來獻九龍車及所獲夏國羊馬辛酉祔章獻

明肅皇后章懿皇后神主于太廟大赦罷轉運使兼  
按察庚午幸瓊林苑遂畋楊村遣使以所獲馳薦太  
廟召父老賜以飲食茶帛辛未頒曆于夏國庚辰罷  
宰臣兼樞密使十一月丁亥冬至宴宗室于崇政殿  
己酉詔河北長吏舉殿直供奉官有武才者是歲施  
州溪洞蠻西南夷龍以特來貢

六年春正月戊申徙廣南戍兵善地以避瘴毒二月  
戊寅青州地震詔陝西經略安撫及轉運司議裁節  
諸費及所置官員無用者以聞三月辛巳朔日有食  
之錄繫囚庚寅登州地震岠嵎山摧自是屢震輒海

底有聲如雷甲午月犯歲星是月賜禮部奏名進士  
諸科及第出身八百五十三人夏四月甲寅遣使賜  
湖南戍兵方藥五月甲申京師雨雹地震丙戌錄繫  
囚戊子減邛州鹽井歲課繙錢一百萬丙申詔陝西  
市蕃部馬丁酉京東人劉柂劉汎胡信謀反伏誅六  
月庚戌朔詔夏竦與河北監司察帥臣長吏之不職  
者丁巳有流星出營室南其光燭地隱然有聲丙寅  
以久旱民多渴死命京城增鑿井三百九十丁丑詔  
制科隨禮部貢舉秋七月丁亥月犯南斗庚寅河東  
經略司言兩壤忻代等州城壁八月癸亥策試賢良

方正能直言極諫并試武舉人癸酉以吳育為樞密副使丁度叅知政事九月甲辰登州言有巨木三千餘浮海而出冬十月辛未詔發兵討湖南徭賊十一月己卯遣官議夏國公封界癸未湖南徭賊寇英韶州界辛丑畋東韓村乘輿所過及圍內田燭其租一年是歲邈川首領唃廝囉西蕃瞎氈磨氈角安化州蠻蒙光速等來貢交趾獻馴象十道州部瀧爵李石辟等降

七年春正月丙子朔御大慶殿受朝丁亥詔河北所括馬死者限二年償之己亥頒慶曆編敕壬寅詔減

連州民被猺害者來年夏租二月己酉詔取益州交子三十萬於秦州募人入中糧丙辰令內侍二人提舉月給軍糧三月壬午鑄繫囚癸未詔天下有能言寬恤民力之事者有司驛置以聞以其副上之轉運司詳其可行者輒行之毀後苑龍船丁亥以旱罷大宴癸巳詔避正殿減常膳許中外臣僚實封條上三事乙未賈昌朝罷以陳執中為昭文館大學士夏竦同中書門下平章事集賢殿大學士吳育為給事中歸班文彥博為樞密副使罷出猶丁酉以夏竦為樞密使文彥博叅知政事高若訥為樞密副使辛丑祈

雨于西太一宮及還遂雨壬寅陳執中宋庠丁度以  
旱降官一等夏四月丁未謝雨己酉詔前京東轉運  
使薛紳專任文吏同察郡縣細過江東轉運使楊紘  
判官王綽提點刑獄王鼎苛刻相尚並削職知州自  
今毋復用為部使者壬子御正殿復常膳乙卯復執  
中庠度官已巳詔諫官非公事毋得私謁五月戊寅  
詔武臣非歷知州軍無過者毋授同提點刑獄己丑  
補降徭唐和等為峒主己亥命翰林學士楊察蠲放  
天下逋負辛丑詔西北二邊有大事二府與兩制以  
上雜議之六月乙巳詔禁畜猛獸害人者辛酉詔天

下知縣非鞠獄母得差遣壬戌詔臣僚朝見者留京  
毋過十日秋七月癸未奉安太祖太宗真宗御容于  
南京鴻慶宮甲申德音降南京畿內囚罪一等徒以  
下釋之賜民夏稅之半除災傷倚閣稅及欠折官物  
非侵盜者辛丑禁貢餘物饋近臣八月乙丑折河北  
為四路各置都總管九月丁酉詔刪定一州一縣敕  
冬十月壬子李迪薨甲子幸廣親宅謁太祖太宗神  
御殿宴宗室賜器幣有差乙丑河陽許州地震十一  
月乙未加上真宗謚丙申朝饗景靈宮丁酉饗太廟  
奉慈廟戊戌冬至祀天地于圜丘大赦貝州宣毅卒

王則據城反十二月戊申加恩百官庚戌樞密直學士明鑄體量安撫河北癸丑詔貝州有能引致官兵獲賊者授諸衛上將軍甲寅遣內侍以敕榜招安貝賊是歲西蕃磨磧角來貢

八年春正月丁丑文彥博宣撫河北明鑄副之壬午江寧府大乙未日赤無光閏月辛丑貝州平甲辰曲赦河北賜平貝州將士繙錢戰沒者官為葬祭兵所踐民田燭其稅改貝州為恩州戊申文彥博同中書門下平章事集賢殿大學士官吏將士有功者遷擢有差辛酉親從官顏秀等四人夜入禁中謀為變宿衛

兵捕殺之丙寅磔王則于都市丁卯知貝州張得一  
坐降賊伏誅二月癸酉頒慶曆善救方夏國來告襄  
霄卒己卯賜瀛莫恩冀州緝錢二萬贖還饑民鬻子  
丁酉奉安宣祖太祖太宗御容于睦親宅三月甲辰  
詔禮部貢舉辛亥遣使體量安撫陝西甲寅幸龍圖  
天章閣詔輔臣曰西陲備禦兵冗賞濫罔知所從卿  
等各以所見條奏又詔翰林學士三司使知開封府  
御史中丞曰朕躬闕失左右朋邪中外險詐州郡暴  
虐法令有不便於民者朕欲聞之其悉以陳壬戌以  
霖雨錄繫囚癸亥以朝政得失兵農要務邊防備豫

將帥能否財賦利害錢法是非與夫謫人害政姦盜亂俗及防微杜漸之策召知制誥諫官御史等諭之使悉對于篇夏四月己巳朔封襄霄子諒祚為夏國主壬申丁度罷明鑄叅知政事五月辛酉夏竦罷宋庠為樞密使龐籍叅知政事六月戊辰朔詔近臣舉文武官材堪將帥者丙子河決澶州商胡埽壬辰以父雨齋禱甲午明鑄卒乙未詔館閣官湏親民一任方許入省府及轉運提點刑獄差遣丙申章得象薨秋七月戊戌以河北水令州縣募饑民為軍辛丑罷鑄錢錢八月己丑以北京東西水災罷秋宴九月

戊午詔三司以今年江淮漕米轉給河北州軍冬十一月己亥作皇帝欽崇國祀之寶壬戌出廩米減價以濟畿內貧民十二月乙丑朔以霖雨為災頒德音改明年元減天下囚罪一等徒以下釋之出內藏錢帛賜三司貿粟以濟河北流民所過官為舍止之所賚物毋收筭丁卯冊羨人張氏為貴妃戊子遣使體量安撫利州路是歲廬州合肥縣稻冉實交州來貢皇祐元年春正月甲戌朔日有食之以河北水災罷上元張燈停作樂庚戌張士遜薨己未詔以緡錢二十萬市穀種分給河北貧民辛酉詔臺諫非朝廷得

失民間利病毋風聞彈奏二月戊辰以河北疫遣使  
頒藥辛未發禁軍十指揮赴京東西路備盜三月丁  
巳錄繫囚己未契丹遣使來告伐夏國庚申翰林院  
學士錢明逸報使契丹是月賜禮部奏名進士諸科  
及第出身千三百九人四月癸未梓州轉運司言濟  
井監夷人平六月甲子蠲河北復業民租賦二年甲  
戌始置觀文殿大學士戊寅詔中書樞密非聚議毋  
通賓客戊子詔轉運使提點刑獄所部官吏受賊失  
覺察者降黜秋七月丁酉詔臣僚毋得保薦要近內  
臣已未詔諸州歲市藥以療民疾八月壬戌陳執中

罷以文彥博為昭文館大學士宋庠同中書門下平  
章事集賢殿大學士龐籍為樞密使高若訥參知政  
事梁適為樞密副使甲申策制舉武舉人九月乙巳  
廣源州蠻儂智高寇邕州詔江南福建等路發兵以  
備戊午大白犯南斗己未罷武舉冬十一月丙申詔  
河北被災民八十以上及篤疾不能自存者人賜米  
一石酒一斗辛丑詔民有寃貧不能詣闕者聽訴於  
監司以聞十二月甲子遣入內供奉高懷政督捕邕  
州盜賊是歲大留國來貢

本紀卷第十一

本紀卷第十二

宋史十二

開寶三司上精鑄國畫書局丞相農修國史領編選事都總義晚等奉

勅修

仁宗四

二年春正月癸卯以歲饑罷上元觀燈壬子命近臣同三司較天下財賦出入之數二月甲申出內庫絹五十萬下河北陝西河東路以備軍賞三月戊子朔詔季秋有事于明堂己丑以大慶殿為明堂甲午遣官祈雨丁酉月犯軒轅大星戊戌詔明堂禮成群臣母上尊號庚子契丹遣使以伐夏師還來告丙午雨

己酉詔兩浙流民聽人收養翰林學士趙槩報使契  
丹夏五月丁亥朔新作明堂禮神玉己亥旌定州義  
民李能六月己未出新製明堂樂八曲丁卯以自製  
黃鐘五音五曲並肄于太常庚午定選舉縣令法壬  
申月犯填星癸未錄繫囚熒惑入輿鬼犯積尸癸亥  
出內藏絹百萬市糴軍儲壬申深州大雨壞廬舍九  
月丁亥閱雅樂己酉朝饗景靈宮庚戌饗太廟辛  
亥大饗天地于明堂以太祖太宗真宗配如圜丘大  
赦百官進秩一等詔自今內降指揮百司執奏毋輒  
行敢因緣干請者諫官御史察舉之冬十月庚午熒

惑犯太微上將乙亥宴京畿父老子于錫慶院閏十一月己未詔后妃之家毋得除二府職任丙寅秀州地震有聲如雷丁卯詔中書門下省兩制及太常官詳定太樂河北水詔蠲民租出內藏錢四十萬緡絹四十萬匹付本路使措置是歲芻糧十二月甲申定三品以上家廟制喇叭囉西蕃瞎氈西南蕃龍光灝占城沙州來貢涇原路生戶都首領那龍男阿日丁內附

三年春正月乙丑幸魏國大長公主第視疾二月丙戌宰臣文彥博等進皇祐大饗明堂記己亥復行

河北沿邊州軍入中糧草見錢法三月庚申宋庠罷以劉沆參知政事癸酉儂智高表獻馴象及金銀郤之夏四月癸未詔河北流民相屬吏不加恤而乃飾厨傳交賂使客以取名譽自今非犒設兵校其一切禁之丙申太白晝見五月庚戌以恩冀州旱詔長吏決繫囚壬申置河渠司乙亥頒簡要濟衆方命州縣長吏按方劑以救民疾丁丑錄繫囚六月丁亥無為軍獻芝草帝命姑免知軍茹孝標罪戒州郡自今勿復獻秋七月癸丑詔少卿監以下年七十不任釐務者御史臺審官院以聞嘗任館閣臺諫及提刑

者中書裁處待制以上能自引年則優加恩禮丙辰  
以孔氏子孫復知仙源縣事己兩制禮官上大樂  
名曰太安辛酉河決大名府郭固口乙丑罷徙州縣  
長吏不任事者十有六人丙子減郴永州桂陽監丁  
身米歲十萬餘石八月丙戌遣使安撫京東淮南兩  
浙荆湖江南饑民辛卯詔諸路監司具所部長吏  
治狀能否以聞是月汴河絕流冬十月庚子文彥  
博罷以龐籍同中書門下平章事昭文館大學士  
高若訥為樞密使梁適參知政事王堯臣為樞密  
副使十一月辛亥減漳州泉州興化軍丁米十二月

庚辰新作渾儀庚子詔文武官七十以上未致仕者更不考課遷官甲辰罷災傷州軍貢物是歲涇原樊家族密廝歌內附

四年春正月己巳詔諸路貸民種乙亥塞大名府決河二月庚子蠲湖州民所貸官米三月己酉詔禮部貢舉丙辰蠲江南路民所貸種數十萬斛辛酉錄繫囚辛未詔官禁市物給實直非所闕者毋市夏四月庚辰詔修河兵夫逃亡死傷會其數以議官吏之罰廣源州蠻儂智高反五月乙巳朔智高陷邕州遂陷橫貴等八州圍廣州壬申命知桂州陳曙率兵討

智高六月乙亥起前衛尉卿余靖為祕書監湖南安  
撫使知潭州前尚書屯田員外郎直史館楊畋體量  
安撫廣南提舉經制盜賊事庚辰改余靖為廣西安  
撫使知桂州命同提點廣東刑獄李樞與陳曙討智  
高廣東轉運鈐轄司發兵援之丁亥以狄青為樞密  
副使秋七月乙巳出內藏錢綱助河北軍儲丙午命  
余靖經制廣南盜賊事丁巳大風拔木壬戌智高引  
衆去廣州廣東兵馬鈐轄張忠知英州蘇緘邀擊于  
白田忠戰歿甲子廣東兵馬鈐轄蔣偕又敗于路田  
八月癸未詔開封府比大風雨民廬壠圯壓死者官

爲祭歛之辛卯命樞密直學士孫沔安撫湖南江西  
內侍押班石全斌副之九月丁巳命余靖提舉廣南  
兵甲經制賊盜事庚申廣西兵馬鈐轄王正倫討智  
高于昭州館門驛戰沒智高入昭州庚午以狄青爲  
宣徽南院使宣撫荆湖路提舉廣南經制賊盜事是  
月智高襲殺蔣偕于太平場冬十月丙子太白犯南  
斗詔鄜延環慶涇原路擇蕃落廣銳軍各五十人赴  
廣南行營丁丑智高入賓州甲申復入邕州丁亥以  
諸路飢疫并征徭科調之煩令轉運使提點刑獄親  
民官條陳救恤之術以聞十一月壬寅朔日有食之

戊午詔免江西湖南廣南民供軍須者今年秋租十  
之三十二月壬申朔廣西兵馬鈐轄陳曙討智高  
兵戰于金城驛壬辰觀新樂乙未錄唐顏真卿後是  
歲河北路及鄜州水蠲河北民積年逋負鄜州民稅  
役

五年春正月壬寅朔御大慶殿受朝庚戌以廣南用  
兵罷上元張燈白虹貫日丁巳會靈觀火戊午狄青  
敗智高于邕州斬首五千餘級智高遁去甲子遣使  
撫問廣南將校賜軍士繕錢二月癸未狄青復爲樞  
密副使甲申赦廣南凡戰歿者給棺槨護送還家無

主者葬祭之賊所過郡縣免其田租一年死事家科  
徭二年貢舉人免解至禮部不預奏名者亦以名聞  
丙戌詔廣西都監蕭注等追捕智高丁亥下德音  
減江西湖南繫囚罪一等徒以下釋之丁壯饋運廣  
南軍須者減夏稅之半仍免差徭一年戊子詔百官  
遇南郊奏薦無子孫者聽奏替親一人乙未詔宗  
室通經者大宗正司以聞三月癸亥遣使奉安太祖  
御容于滁州太宗御容于并州真宗御容于澶州  
是月賜禮部奏名進士諸科及第出身千四十二人  
夏四月甲午命劉沆梁適監議大樂五月乙巳詔

輔臣凡有大政許復對後殿高若訥罷以狄青爲  
樞密使丁未孫沔爲樞密副使戊申詔轉運使毋取  
羨餘以助三司庚戌詔智高所至州無城壘若兵力  
不敵而棄城者奏裁壬子錄繫囚丁巳詔轉運司振  
邕州貧民戶貸米一石甲子詔諫官御史毋挾私以  
中善良及臣僚言機密事毋得漏泄六月乙亥御  
紫宸殿按太安樂觀宗廟祭器丙戌作集禧觀成  
乙未詔河北荐饑轉運使察州縣長吏能招輯勞  
來者上其狀不稱職者舉劾之秋七月乙巳詔荆湖  
北路民因災傷所貸常平倉米免償己酉詔薦舉

非其人者令御史臺彈奏見任監司以上弗許薦論戊午詔太常定謚母爲溢美閏月戊辰詔廣南民逃未還者限一年歸業其復三歲壬申龐籍罷以陳執中同中書門下平章事昭文館大學士梁適同中書門下平章事集賢殿大學士乙亥詔武臣知州軍須與僚屬參議公事母專決庚辰秦鳳路言總管劉煥等破蕃部斬首二千餘級八月丁酉朔詔民訴災傷而監司不受者聽州軍以狀聞辛酉策制舉武舉人壬戌詔南郊以太祖太宗真宗並配九月乙酉觀新樂冬十月丙申朔日有食之壬子作

鎮國神寶丁巳詔以蝗旱令監司諭親民官上民間  
利害十一月丁卯朝饗景靈宮戊辰饗太廟奉慈  
廟己巳祀天地于圜丘大赦丁丑加恩百官戊子放  
天下逋負十二月戊午詔轉運官毋得進羨餘壬戌  
以曹陳許鄭滑州爲輔郡隸畿內置京畿轉運使  
是歲占城國來貢

至和元年春正月辛未詔京師大寒民多凍餒死者  
有司其瘞埋之壬申碎通天犀和藥以療民疫癸  
酉貴妃張氏薨輶視朝七日禁京城樂一月丁丑追  
冊爲皇后賜謚溫成辛卯錄繫囚減三京輔郡雜犯

死罪一等徒以下釋之二月庚子詔治河堤民有疫  
死者蠲戶稅一年無戶稅者給其家錢三千壬戌孫  
汚罷以田况爲樞密副使三月己巳王貽永罷以王  
德用爲樞密使辛未命曾公亮等同試入內醫官  
壬申賜邊臣攻守圖置京畿提點刑獄乙亥太史言  
日當食四月朔庚辰下德音改元減死罪一等流以  
下釋之癸未易服避正殿減常膳乙酉詔京西民飢  
宜令所在勸富人納粟以振之夏四月甲午朔日有  
食之用牲于社辛丑御正殿復常膳祥源觀火五  
月戊寅以河北流民稍復遣使安撫壬辰太白晝覓

秋七月丁卯以程戡參知政事立溫成園戊辰梁適  
罷己巳出御史馬遵呂景初吳中復八月丁酉詔前  
代帝王後嘗仕本朝官八品以下其祖父母妻子犯  
流以下罪聽贖未仕而嘗受朝廷賜者所犯非兇  
惡亦聽贖丙午以劉沆同中書門下平章事集賢  
殿大學士命修起居注官侍經筵九月乙亥契丹  
遣使來告夏國平辛巳遣三司使王拱辰報使契丹  
己丑太白晝見冬十月辛卯朔太白晝見壬辰詔士  
庶家母得以嘗傭顧之人爲姻遠者離之丁酉葬  
溫成皇后丙午溫成皇后神主入廟戊午幸城北砲

場觀發砲宴從臣賜衛士縉錢十一月甲子出太廟  
禘祫時饗及溫成皇后樂章肄于太常十二月丙  
午詔司天監天文等術官毋得出入臣僚家癸丑詔  
內侍傳宣令都知司劄報被旨者覆奏是歲融州  
大丘洞楊光朝內附

二年春正月丁卯奉安真宗御容于萬壽觀減  
畿內輔郡囚罪一等徒以下釋之賜諸軍縉錢戊辰  
邕州言蘇茂州蠻內寇詔廣西發兵討之丁亥  
晏殊薨二月壬辰汾州圍練推官郭固上車戰法  
既試之授衛尉丞三月丁卯詔修起居注立於講讀

官之次丙子封孔子後爲衍聖公是月以草除畿內  
民逋芻及去年秋逋稅罷營繕諸役夏四月己亥  
契丹遣使賀乾元節以其主之命持本國三世畫  
像來求御容辛亥定差衙前法乙卯出來京城門  
下其價以濟流民五月己未錄繫囚辛酉詔中書  
公事並用祖宗故事戊寅詔戒百官務飭官守六  
月戊戌陳執中罷以文彥博同中書門下平章事  
昭文館大學士劉沆監修國史富弼同中書門下  
平章事集賢殿大學士乙巳儂智高母儂氏弟  
智光子繼宗繼封伏誅秋八月戊子減畿內輔郡囚

罪一等徒以下釋之乙未置臺諫章奏簿壬子  
詔中書樞密院第宗姓服屬自明堂覃恩後及  
十年者咸與進官九月戊午契丹使來告其國  
宗真殂帝爲發哀成服于內東門幕次遣使祭  
奠弔慰及賀其子洪基立戊辰詔試醫官須引  
醫經本草以對每試十道以六通爲合格辛巳罷  
輔臣宣徽節度使乾元節任子恩冬十月丙戌錄唐  
長孫無忌後己丑詔京畿母領輔郡罷京畿轉運  
使提點刑獄癸丑下溪州蠻彭仕羲內寇詔湖北  
路發兵捕之十一月乙卯交趾來告李德政卒其

子日尊上德政遺貢物及馴象已未行並邊見錢  
和羅法十二月丁亥修大塔河丁酉詔武臣有賊濫  
者毋得轉橫行其立戰功者許之庚子契丹遣使  
致其主宗真遺留物及謝弔祭庚戌太白晝見  
壬子作醴泉觀成是歲西界阿訛等內附詔遣還  
龍賜州彭師黨以其族來歸大食國西蕃安化州  
蠻來貢

嘉祐元年春正月甲寅朔御大慶殿受朝是日  
不豫辛酉輔臣禱祠于大慶殿齋宿殿廡近臣  
禱于寺觀及遣諸州長吏禱于獄瀆諸祠壬戌

御崇政殿癸亥賜在京諸軍繕錢甲子赦天下蠲被  
災田租及倚閣稅戊辰罷上元張燈辛未命輔臣  
禱天地宗廟社稷是月大雨雪木冰二月甲辰帝  
疾愈御延和殿三月丁巳詔禮部貢舉辛未司天  
監言自至和元年五月客星晨出東方守天關至是  
日壬申遣官謝天地宗廟社稷寺觀諸祠癸酉契  
丹遣使來謝閏月癸未朔以王堯臣參知政事程戡  
爲樞密副使詔前後殿間日視事夏四月壬子朔六  
塔河復決丙辰裁定補蔭選舉法甲戌錄繫囚是  
月大雨水注安上門門關折壞官私廬舍數萬區

諸路言江河決溢河北尤甚六月辛亥朔詔雙日不  
御殿伏終如舊辛未免畿內京東西河北被水民  
賦租乙亥雨壞太社太稷壇戊寅遣使安撫河北  
己卯詔群臣實封言時政闕失秋七月乙酉命京  
東西湖北監司分行水災州軍振飢蠲租丙戌賜河  
北流民米壓溺死者賜其家錢有差己丑出內藏  
銀絹三十萬振貸河北月入南斗乙巳貸被水災民  
麥種是月彗出紫微垣長丈餘環州小遇族叛知  
州張揆破降之八月庚戌朔日有食之癸亥狄青  
罷以韓琦爲樞密使是夕彗滅甲子出恭謝樂章

肄于太常乙亥朝謁景靈宮減京城繫囚徒罪  
一等杖笞釋之戊寅詔湖北招安彭仕羲九月庚  
寅命宰臣攝事于太廟辛卯恭謝天地于大  
慶殿大赦改元丁酉加恩百官庚子賜致仕卿監  
以上及曾任近侍之臣粟帛酒饌癸卯舉行御  
史遷次格自京至泗州置汴河木岸十一月辛巳  
王德用罷賈昌朝爲樞密使十二月壬子劉沆  
罷以曾公亮參知政事甲子白虹貫日是歲西  
蕃磨擅角占城大食國來貢融桂州蠻楊克端  
等內附

二年春二月己酉梓夔路三里村夷人寇淯井監  
庚戌錄繫囚降罪一等徒以下釋之遣使錄三京  
輔郡繫囚壬戌杜衍薨澧州羅城洞蠻內寇發兵  
擊走之癸酉王德用卒是月雄霸州地震三月  
戊寅振河北被災民乙未契丹使耶律防陳覩來  
求御容戊戌淮水溢遣張昇報使契丹癸卯狄  
青卒是月賜禮部奏名進士諸科及第出身  
八百七十七人親試舉人免黜落始此夏四月丁  
未以河北地數震遣使安撫丙寅幽州地大震壞  
城郭覆壓死者數萬人己巳邕州火峒蠻侵宗

旦入寇癸酉以彭仕羲未降遣官安撫湖北五月  
庚辰管勾麟府軍馬公事郭恩爲夏人所襲歿  
于斷道塢己亥詔舉行磨勘法六月戊午夏國  
主諒祚遣人來謝使弔祭戊辰以淑妃苗氏爲賢  
妃秋七月辛巳詔河北諸道總管分遣兵官教  
閱所部軍辛卯命孫抃張昇磨勘轉運使及提  
點刑獄課績丁酉詔陝西河北諸路經略安撫舉文  
武官材堪將領者各一人八月己酉詔每歲賜諸  
道節鎮諸州錢有差命長吏選官和藥以救民  
疾壬子命富弼等詳定編敕庚申錄繫囚降罪

一等徒以下釋之癸亥策制舉人丁卯置廣惠倉  
九月庚子契丹再使蕭扈吳湛來求御容冬十  
月乙巳遣胡宿報使契丹丙午班祿令十一月丙  
申詔三司使體量判官才否以聞十二月戊申詔  
自今間歲貢舉天下進士諸科解舊額之半置  
明經科罷說書舉人辛亥立內降閩白三府法是  
歲西蕃瞻彊并諸族西平州黔南道王石自品西  
南蕃鶴州來貢

三年春正月戊戌鑿永通河二月癸卯契丹使來  
告其祖母哀輶視朝七日遣使癸酉奠弔慰癸丑

錄繫囚降罪一等徒以下釋之三月甲戌詔禮部貢舉夏四月甲子吳育卒乙丑罷睦親宅祖宗神御殿丙辰詔守令或貪恣耄昏以施爲寬以苛爲察以增賦歛爲勞以出入刑罰爲能而部使者莫之舉勑自今其各思率職毋撓權倖毋縱有罪以稱朕意五月壬申增國子監生員甲午契丹遣使致其祖母遺留物六月丙午文彥博賈昌朝罷以副爲昭文館大學士韓琦同中書門下平章事集賢殿大學士宋庠田况爲樞密使張昪爲樞密副使甲寅詔學士院編國朝制誥丁卯交趾貢異

獸秋七月丙子詔廣濟河溢原武縣河決遣官行  
視民田振恤被水害者癸巳以夔州路旱遣使安  
撫八月己亥朔日有食之己未王堯臣卒庚申彭  
仕羲率衆降九月癸酉議罷榷茶法己丑契丹  
遣使來謝冬十月癸亥除河北坊郭客戶乾食鹽  
錢十一月癸酉議減冗費己丑置都水監罷三司  
河渠司十二月己巳詔三司歲上天下稅賦之數  
三歲一會勸羸以聞閏月丁卯朔詔吏人及伎術  
官職毋得任知州軍提點刑獄自軍班出至正任  
者方得知邊要州軍丁丑詔裁定制科及進士高

第人恩數庚辰詔明年正旦日食其自丁亥避正殿減常膳宴契丹使毋作樂壬午錄繫囚降三京囚罪一等徒以下釋之是歲安化上中下州北還鎮蠻人來貢

四年春正月丙申朔日有食之用牲于社辛丑御正殿復常膳以自冬雨雪不止遣官分行京城賜孤窮老疾錢畿縣委令佐爲糜粥濟飢壬寅賜在京諸軍班縉錢頒嘉祐驛令二月己巳罷榷茶庚午廣南言交趾寇欽州乙亥以廣惠倉隸司農寺戊子白虹貫日三月戊戌

命近臣同三司減定民間科率是月賜進士諸科  
及第出身三百三十九人夏四月丁卯詔孟冬大  
祫于太廟癸酉封柴氏後爲崇義公給田十頃  
奉周室祀丙子復銀臺司封駁制癸未陳執中  
薨辛卯詔中外臣庶居室器用冠服妾媵有違  
常制必罰毋貸壬辰錄繫囚降罪一等徒以下  
釋之大震電雨雹五月戊戌詔兩制臣僚舊制  
不許詣執政私第所舉薦不得用爲御史今除  
其法庚子詔內臣員多權罷進養子入內壬子  
遣官經界河北牧地餘募民種藝六月己巳群

臣請加尊號曰大仁至治表五上不許癸酉詔諸路  
經略安撫轉運使提點刑獄各舉本部官有行實  
政事者三人以備升擢嘗任兩府者許舉內外官  
丁丑詔轉運司凡隣州饑而輒閉糶者以違制論  
辛卯放宮女二百十四人秋七月丁未放宮女三百  
三十六人八月乙亥策制舉人冬十月壬申朝饗  
景靈宮癸酉大祫于太廟大赦詔諸路監司察士  
有學行爲鄉里所推者同長吏以聞民父母年八十  
以上復其一丁復益州爲成都府并州爲太原  
府戊寅加恩百官十一月庚子汝南郡王允讓薨

十二月丁丑白虹貫日是歲啞廝囉來貢

五年春正月辛卯朔白虹貫日太白犯歲星己亥  
錄劉繼元後二月壬戌錄繫囚三月壬辰詔禮部貢  
舉癸巳劉沆薨乙未歲星晝見壬子詔以蝗澆  
相仍敕轉運使提點刑獄督州縣振濟仍察不  
稱職者夏四月癸未程戡罷以孫林爲樞密副  
使丙戌命近臣同三司議均稅五月戊子朔京師  
民疫選醫給藥以療之己丑京師地震丁酉詔  
三司置寬恤民力司己酉王安石召入爲三司度支  
判官丁巳錄繫囚降罪一等徒以下釋之六月乙丑

詔戒上封告訐人罪或言赦前事及言事官彈劾  
小過不關政體者乙亥遣官分行天下訪寬恤民  
力事秋七月癸巳邕州言交趾與甲峒蠻合兵寇  
邊都巡檢宋士堯拒戰死之詔發諸州兵討捕丙  
申詔待制臺諫官正刺史以上各舉諸司使至  
三班使臣堪將領及行陣戰鬪者三人戊戌翰林  
學士歐陽脩上新修唐書庚戌詔中書門下采  
端實之士明進諸朝辨激巧偽者放黜之八月壬  
申詔求逸書庚辰置陝西估馬司乙酉罷諸路  
同提點刑獄使臣丙戌置江湖閩廣四川十一路轉

運判官九月己丑太白晝見冬十月乙酉深州  
言野蠶成繭被于原野十一月辛卯罷內臣  
寄遷法辛丑宋庠罷以曾公亮爲樞密使張  
昇孫朴爲參知政事歐陽脩陳升之趙槩爲樞  
密副使十二月己卯蘇茂州蠻寇邕州辛巳補  
諸州父老百歲以上者十二人爲州助教是歲大  
食國來貢

六年春正月乙未許兩制與臺諫相見二月丁  
巳詔宗室賜名授官者須年及十五方許轉官  
乙丑詔良民子弟或爲人誘隸軍籍自今兩月

內父母訴官者還之丙寅錄繫囚降罪一等徒以下釋之三月己亥富弼以母喪去位庚子以富弼母喪罷大宴戊申給西京周廟祭享器服是月賜進士諸科及第同出身二百九十五人夏四月辛酉詔嶺南官吏死于僂賊而其家流落未能自歸者所在給食護送還鄉庚辰陳升之罷以包拯爲樞密副使出諫官唐介趙抃御史范師道呂誨五月丙戌官諸路敷遣行義文學之士七人庚戌錄繫囚降罪一等徒以下釋之分命官錄三京繫囚六月壬子朔日有食之乙丑太白晝見壬申歲星晝見丙

予以司馬光知諫院入對戊寅以王安石知制誥秋  
七月乙酉泗州淮水溢丙戌詔淮南江浙水災差官  
體量蠲稅戊子錄昭憲皇太后孝明孝惠孝章淑  
德皇后家子孫進秩授官者十有九人癸巳詔臺  
諫爲耳目之官乃聽險陂之人興造飛語中傷  
善良非忠孝之行也中書門下其申倣百工務  
敦行實循而弗改者絀之八月乙亥策制舉人  
丁丑詔諸路刺舉之官未有以考其賢否比  
令有司詳定厥制其各務祇新書以稱朕意仍  
令考校轉運提刑課績院以新定條目施行戊

宣詔州縣長吏有清白不擾而實惠及民者  
令本路監司保薦再任政迹尤異當加獎擢閏  
月乙酉復以成都府爲劍南西川節度庚子以  
韓琦爲昭文館大學士曾公亮同中書門下  
平章事集賢殿大學士張昇爲樞密使辛丑  
以胡宿爲樞密副使冬十月壬午定內侍磨勘法  
丙戌詔京西淮浙荆湖增置都同巡檢壬辰起復  
皇姪前右衛大將軍岳州團練使宗實爲秦州  
防禦使知宗正寺辭以喪不拜十一月己巳許夏  
國用漢衣冠癸酉賜昭憲皇太后家信陵坊第

戊寅許康州刺史李樞以已官封贈父母十二月  
丙戌復豐州庚寅命諸路總管集隨軍功過  
簿以備遷補是歲冬無冰占城國獻馴象安化  
州蠻來貢

七年春正月辛未復命皇姪宗實為秦州防  
禦使知宗正寺乙亥詔南郊以太祖配為定制改  
溫成皇后廟為祠殿二月己卯朔更江西鹽法詔  
開封府市地于四郊給錢瘞民之不能葬者癸未  
錄繫囚命官錄被水諸州繫囚三月辛亥詔禮  
部貢舉乙卯孫朴罷以趙槩參知政事吳奎為

樞密副使甲子以旱罷大宴乙丑祈雨于西太一宮  
庚午謝雨壬申徐州彭城濠州鍾離地生麪十餘  
頃民皆取食夏四月壬午頒嘉祐編敕己丑夏國  
主諒祚進馬求賜書詔賜九經還其馬五月戊午  
太白晝見庚午包拯卒六月丙子朔歲星晝見  
秋七月戊申太白經天壬子詔李秋有事于明堂  
八月乙亥朔出明堂樂章肆于太常己卯詔以  
宗實爲皇子癸未賜名曙丁亥奉安真宗御  
容于壽星觀庚子以立皇子告天地宗廟諸陵  
九月乙巳朔以皇子爲齊州防禦使進封鉅鹿

郡公已酉朝饗景靈宮庚戌饗太廟辛亥大  
饗明堂奉真宗配大赦己未加恩百官冬十月  
乙亥皇子表辭所除官賜詔不允丙戌白虹貫  
日乙未太白晝見丙申詔內藏庫三司共出緡錢  
一百萬助糴天下常平倉十二月甲午德妃沈氏  
爲貴妃賢妃苗氏爲德妃丙申幸龍圖天章閣召  
群臣宗室觀祖宗御書又幸寶文閣爲飛白書  
分賜從臣作觀書詩命韓琦等屬和遂宴群玉  
殿庚子再召從臣于天章閣觀瑞物復宴群玉殿  
是歲冬無冰占城來貢

八年春正月辛亥交阯貢馴象九二月癸未帝不豫甲申下德音減天下囚罪一等徒以下釋之丙戌中書樞密奏事于福寧殿之西閣三月戊申寵籍薨癸亥御內東門幄殿優賜諸軍繙錢甲子御延和殿賜進士諸科及第同出身三百四十一人辛未帝崩于福寧殿遺制皇子即皇帝位皇后爲皇太后喪服以日易月山陵制度務從儉約謚曰神文聖武明孝皇帝廟號仁宗十月甲午葬永昭陵

贊曰仁宗恭儉仁恕出於天性遇水旱或密禱

禁廷或跣立殿下有司請以玉清舊地爲御苑帝  
曰吾奉先帝死固猶以爲廣何以是爲燕私常  
服幹濯帷席衾裯多用繒絰宮中夜飢思膳燒  
羊戒勿宣索恐膳夫自此戕賊物命以備不時之  
須大辟疑者皆令上讞歲常活千餘吏部選人  
坐失入死罪皆終身不遷每諭輔臣曰朕未嘗置  
人以死況敢濫用辟乎至於夏人犯邊禦之出境契  
丹渝盟增以歲幣在位四十二年之間吏治若媿惰  
而任事茂殘刻之人刑法似縱弛而決獄多平允之士  
國未嘗無弊倖而不足以累治世之體朝未嘗無

小人而不足以勝善類之氣君臣上下惻怛之心忠厚之政有以培壅宋三百餘年之基子孫一矯其所爲馴致於亂傳曰爲人君止於仁帝誠無愧焉

本紀卷第十二

本紀卷第十三

宋史十三

開府儀同三司上柱國錄軍國事書前書右丞相監修國史領經筵事都總裁殿閣等奉

勅修

英宗

英宗體乾應曆隆功盛德憲文肅武睿聖宣孝皇帝諱曙濮安懿王允讓第十三子母曰仙遊縣君任氏明道元年正月三日生於宣平坊第初王夢兩龍與日並墮以衣承之及帝生赤光滿室或見黃龍游光中四歲仁宗養於內寶元二年豫王生乃歸濮邸帝天性篤孝好讀書不為燕嬉襲慢服御儉素如儒者每

以朝服見教授曰師也敢弗為禮時吳王官教吳充進宗室六歲仁宗付宗正帝書之屏風以自戒景祐三年賜名宗實授左監門衛率府副率累遷右羽林軍大將軍宜州刺史皇祐二年為右衛大將軍岳州團練使嘉祐中宰相韓琦等請建儲仁宗曰宗子已有賢知可付者卿等其勿憂時帝方服濮王喪六年十月辛卯起為秦州防禦使知宗正寺帝以終喪辭奏四上乃聽喪終復授前命又辭七年八月許罷宗正復為岳州團練使戊寅立為皇子癸未改今名帝聞詔稱疾益堅辭詔同判大宗正事安國公從古等

往喻旨即卧內起帝以入甲辰見清居殿自是日再朝或入侍禁中九月遷齊州防禦使鉅鹿郡公八年仁宗崩夏四月壬申朔皇后傳遺詔命帝嗣皇帝位百官入哭盡哀韓琦宣遺制帝御東楹見百官癸酉大赦賜百官爵一等優賞諸軍如乾興故事遣王道恭告哀于契丹帝欲亮陰三年命韓琦攝冢宰宰臣不可乃止乙亥帝不豫遣韓贊等告即位于契丹丙子尊皇后曰皇太后己卯詔請皇太后同聽政壬午皇太后御小殿垂簾宰臣覆奏事乙酉作受命寶丁亥以皇子右千牛衛將軍仲鍼為安州觀察使光國

公薨惑自七年八月庚辰不見命宰臣祈禳至是月  
己丑見于東方庚子立京兆郡君高氏為皇后五月  
戊午以富弼為樞密使戊辰初御延和殿以疾未平  
命宰臣祈福于天地宗廟社稷及寺觀又禱于岳瀆  
名山六月辛卯契丹遣蕭福延等來祭弔秋七月壬  
子初御紫宸殿帝自六月癸酉不御殿至是始見百  
官癸亥歲星晝見乙丑星大小數百西流戊辰百官  
請大行皇帝謚于南郊八月癸巳以生日為壽聖節  
九月辛亥以光國公仲鍊為忠武軍節度使同中書  
門下平章事淮陽郡王改名頊戊午上仁宗謚冊于

福寧殿冬十月甲午葬仁宗于永昭陵十一月丙午  
祔于太廟大風霆已酉減東西二京罪囚一等免山  
陵役戶及靈駕所過民租辛亥契丹遣蕭素等來賀  
即位十二月己巳初御邇英閣召侍臣講讀經史乙  
亥淮陽郡王頊出閤是歲于闐西南蕃來貢

治平元年春正月丁酉朔改元戊戌太白晝見己亥  
壽聖節百官及契丹使初上壽于紫宸殿甲寅賞知  
唐州趙尚寬修溝堰增戶口進一官賜錢二十萬三  
月壬寅命修秦悼王冢置守護官戊午錄囚辛酉雨  
土夏四月癸未放宮女百三十五人甲午祈雨于相

國天清寺醴泉觀賜諸軍錢有差五月己亥濬二股  
河戊申皇太后還政庚戌初日御前後殿壬子詔皇  
太后稱聖旨出入儀衛如章獻太后故事其有所湏  
內侍錄聖旨付有司覆奏即行丙辰上皇太后宮殿  
名曰慈壽已未熒惑犯太微上將壬戌以病愈命宰  
臣謝天地宗廟社稷及宮觀閏月戊辰輔臣進爵一  
等六月己亥以淮陽郡王頊為穎王祁國公顥為保  
寧軍節度使同中書門下平章事東陽郡王鄆國公  
顥為左衛上將軍增宗室教授丁未增同知大宗正  
事一員辛亥作睦親廣親宅辛酉太白晝見壬戌歲

星晝見八月甲辰錄周世宗後甲寅太白入太微垣  
乙卯遣兵部員外郎呂誨等四人充賀契丹太后生  
辰正旦使刑部郎中章岷等四人充賀契丹主生辰  
正旦使丙辰內侍都知任守忠坐不法貶保信軍節  
度副使蘄州安置丁巳以上供米三萬石振宿亳二  
州水災戶九月丁卯復武舉庚午詔夏國精擇使人  
戒勵母紊彝章冬十月丙申詔中外近臣監司舉治  
行素著可備升擢者二人十一月乙亥科陝西戶三  
丁之一刺以為義勇軍凡十三萬八千四百六十五  
人各賜錢二千諫官司馬光累上疏諫之不允戊寅

復內侍養子令十二月乙巳雨土丙辰契丹遣耶律烈等來賀壽聖節蕭禧等來賀明年正旦是歲畿內宋亳陳許汝蔡唐穎曹濮濟單濠泗廬壽楚杭宣洪鄂施渝州光化高郵軍大水遣使行視疏治振恤蠲其賦租西蕃瞎邏子瞎欺米征內附

二年春正月甲戌振蔡州二月甲辰大風晝冥丁未錄囚是月賜禮部奏名進士明經諸科及第出身三百六十一人三月己巳班明天曆夏四月戊戌詔議崇奉濮安懿王典禮辛丑詔監司知州歲薦吏毋徒充數丙午奉安仁宗御容于景靈宮丁未白氣起西

方五月癸亥詔以綜核名實勵臣下丙子詔自今皇子及宗室屬卑者勿授以檢校師傅官乙酉詔宗室封王者子孫襲爵六月壬辰錄囚己酉詔尚書集三省御史臺議奉濮安懿王典禮甲寅罷尚書省集議令有司博求典故務在合經詔遣官與契丹定疆界秋七月癸亥富弼罷丙寅詔減乘輿服御丙子放宮女百八十人丁丑太白晝見己卯群臣五上尊號不允庚辰張昪罷以文彥博為樞密使八月庚寅京師大雨水癸巳賜被水諸軍米遣官視軍民水死者十五百八十人賜其家緡錢塋祭其無主者乙未以雨災

詔責躬乞言初學士草詔曰執政大臣其惕思天變  
帝書其後曰雨災專以戒朕不德可更曰協德文備  
己亥以水災罷開樂宴壬子以工部郎中蔡抗等充  
賀契丹生辰使侍御史趙鼎等充賀契丹正旦使乙  
卯減袞冕制度丙辰陝西置壯城兵九月壬戌雨罷  
太宴己巳以災異風俗策制舉人壬午太白犯南斗  
乙酉以久雨遣使祈于岳瀆名山大川冬十月乙巳  
雨水冰十一月庚午朝饗景靈宮辛未饗太廟壬申  
有事南郊大赦上皇太后冊皇后以齊州為興德  
軍節度辛巳加恩百官十二月辛亥太白晝見是歲

蔣波繡雲龍賜等州來貢

三年春正月丙辰朔契丹遣使耶律仲達等來賀正旦戊午契丹遣使蕭惟輔等來賀壽聖節丙寅幸降聖院謁神御殿癸酉契丹改國號為遼己卯溫州火燒民屋萬四千間死者五千人丁丑皇太后下書中書門下封濮安懿王宜如前代故事王夫人王氏韓氏任氏皇帝可稱親尊濮安懿王為皇夫人為后詔遵慈訓以塋為園置守衛吏即園立廟俾王子孫主祠事如皇太后旨辛巳詔臣民避濮安懿王諱以王子宗懿為濮國公壬午黜御史呂誨范純仁呂大防

二月乙酉朔白虹貫日三月庚申彗星晨見于室辛酉黜諫官傅堯俞御史趙鼎趙瞻戊辰上親錄囚庚午以彗避正殿減膳辛未以黜呂誨等詔內外癸酉以災異責躬詔轉運使察獄訟調役利病大者以聞辛巳彗晨見于昴如太白長丈有五尺壬午孛于畢如月夏四月丙午詔有司察所部左道淫祀及賊殺善良不奉令者罪毋赦五月甲子罷知雜御史觀察使以上歲舉人乙丑彗至張而沒戊辰謂宰相曰朕欲與公等日論治道中書常務有定制者付有司行之六月己酉錄囚秋七月乙丑進濮王子孫及魯王

孫爵一等八月庚子遣傳卡等賀遼主生辰張師顏  
等賀正旦九月壬子朔日有食之癸亥定待制諫官  
朝官少卿郎中遷選歲月補員格庚辰禁妃嬪公主  
以下薦服親之夫冬十月壬午朔以仙遊縣君任氏  
墳域為園乙酉詔兩日一御邇英閣丁亥詔禮部三  
歲一貢舉甲午詔宰臣叅知政事舉才行士可試館  
職者各五人十一月戊午帝不豫禱于太慶殿己未  
宰相始奏事辛酉降天下囚死罪一等流以下釋之  
十二月乙未宰相祈于天地宗廟社稷壬寅立頴王  
頊為皇太子癸卯大赦賜文武官子為父後者勲一

轉遼遣蕭靖等來賀正旦壽聖節是歲遣使以違約  
數冠責夏國諒祚獻方物謝罪

四年春正月庚戌朔羣臣上尊號曰體乾膺曆文武  
聖孝皇帝降天下囚罪一等徒以下釋之大風霾辛  
亥繩京師逋麪錢丁巳帝崩于福寧殿壽三十六謚  
曰憲文肅武宣孝皇帝廟號英宗帝自居睦親宅孝  
德著聞濮安懿王薨以所服玩物分諸子帝所得悉  
以與王府舊人旣葬而辭去者宗室有假金帶而以  
銅帶歸主吏以告帝曰真吾帶也受之命殿侍鬻犀  
帶直錢三十萬亡之帝亦不問初辭皇子請潭王宮

教授周孟陽作奏孟陽有所勸戒即謝而拜之奏十  
餘不允始就召戒舍人曰謹守吾舍上有適嗣吾歸  
矣既為皇子慎靜恭默無所猷為而天下陰知其有  
聖德即位每命近臣必以官而不以名大臣從容以  
為言帝曰朕雖宮中命小臣亦未嘗以名也一日語  
神宗曰國家舊制士大夫之子有尚帝女皆升行以  
避舅姑之尊義甚無謂朕嘗思此寤寐不平豈可以  
富貴之故屈人倫長幼之序也可詔有司革之會疾  
不果神宗述其事焉

贊曰昔人有言天之所命人不能違信哉英宗以明

哲之資膺繼統之命執心固讓若將終身而卒踐帝位豈非天命乎及其臨政臣下有奏必問朝廷故事與古治所宜每有裁決皆出羣臣意表雖以疾疢不克大有所為然使百世之下欽仰高風詠歎至德何其盛也彼隋晉王廣唐魏王泰窺覬神器矯揉奪嫡遂啓禍原誠何心哉誠何心哉

本紀卷第十三

本紀卷第十四

宋史十四

開寶十四年正月丁未國寧軍節度使兼侍郎中書舍人知樞密院事

穆

神宗一

神宗紹天法古運德建功英文烈武欽仁聖孝皇帝  
諱頊英宗長子母曰宣仁聖烈皇后高氏慶曆八年  
四月戊寅生于濮王宮祥光照室群鼠吐五色氣成  
雲八月賜名仲鍼授率府副率三遷至右千牛衛將  
軍嘉祐八年侍英宗入居慶寧宮嘗夢神人捧之登  
天英宗即位授安州觀察使封安國公是年五月壬

戊受經于東宮帝隆準龍顏動止皆有常度而天性  
好學請問至日晏忘食英宗常遣內侍止之帝正衣  
冠拱手雖大暑未嘗用扇侍講王陶入侍帝率弟顥  
拜之九月加忠武軍節度使同中書門下平章事封  
淮陽郡王改今諱治平元年六月進封頴王三年三  
月納故相向敏中孫女為夫人十月英宗不豫帝引  
仁宗故事請兩日一御邇英閣講讀以安人心十二  
月壬寅立為皇太子四年正月丁巳英廟崩帝即皇  
帝位戊午赦天下常赦所不原者遣馮行已告哀于  
遼已未尊皇太后曰太皇太后皇后曰皇太后命宰

相韓琦為山陵使辛酉遣孫坦等告即位于遼以大行皇帝詔賜夏國主及西蕃唃廝羅丙寅群臣表三上始御迎陽門幄殿聽政內醫侍先帝疾者皆坐不謹貶之詔東平郡王允弼襄陽郡王允良朝朔望以吳奎終喪復授樞密副使戊辰以韓琦守司空兼侍中曾公亮行門下侍郎兼吏部尚書進封英國公文彥博行尚書左僕射檢校司徒兼中書令富弼改武寧軍節度使進封鄭國公曹佾改昭慶軍節度使檢校太傅張昪改河陽三城節度使宗誥同中書門下平章事改集慶軍節度使檢校尚書左僕射歐陽脩

趙槩並加尚書左丞仍叅知政事陳升之為戶部侍郎呂公弼為刑部侍郎允弼允良並加守太保弟東陽郡王顥進封昌王鄴國公頤進封樂安郡王群臣進秩有差二月乙酉初御紫宸殿立向氏為皇后丁亥詔入內內侍省皇城司合覆奏事並執條覆奏戊子進封交趾郡王李日尊為南平王加邈川首領董璫檢校太保詔山陵所湏應委三司轉運司計置毋輒擾民詔提舉醫官院試堪診御脉者六人庚寅以四月十日為同天節辛卯白虹貫日壬辰詔公主下嫁者行見舅姑禮甲辰西蕃首領拽羅鉢鳩令結二

人誘蕃部三百餘帳投夏國捕獲斬之以徇三月壬子曹佾加檢校太尉兼侍中賜禮部進士及第出身四百六十人甲寅陝西宣撫使郭逵討蕃部党令征等平之賜昌王顥公使錢歲萬緡半給之丙辰昌王顥樂安郡王顥乞解官行服不許癸亥詔入內內侍省官已經壽聖節任子者同天節權罷奏薦壬申歐陽脩知亳州癸酉吳奎參知政事罷乙亥允良薨閏月癸未太白晝見甲申夏國主諒祚遣使謝罪辛卯詔齊密登華邠耀鄜絳潤婺海宿饒歙吉建汀潮等十八州知州慶渭秦巡四州通判其選並從中書

毋以恩例奏授乙未張昇以太子太師致仕庚子詔求直言御史中丞王陶乞許舉知縣資序人為御史裏行從之癸卯王安石出知江寧府甲辰詔諸路帥臣及副總管或有移易依慶曆故事乙巳詔以孟夏農勞之時令監司戒飭州縣省事勸民力田民有艱食者振之夏四月庚戌請大行皇帝謚于南郊辛酉詔內外所上封事令張方平司馬光詳定以聞丙寅錄囚御史中丞王陶侍御史吳申呂景以過毀大臣陶出陳州申景各罰銅二十斤吳奎罷知青州遣使循行陝西河北京東京西路體量安撫壬申奎復位

罷州郡歲貢飲食果藥癸酉詔陝西河東經畧轉運  
司察主兵臣僚怯懦老病者以聞五月辛巳以久旱  
命宰臣禱雨乙巳寶文閣成置學士直學侍制官六  
月己酉遼遣蕭餘慶等來弔祭己未振河北流民辛  
未詔天下官吏有能知徭役利病可議寬減者以聞  
乙亥詔中書樞密細務歸之有司秋七月庚辰詔察  
富民與妃嬪家昏因夤緣得官者甲申石蕃來貢己  
丑命尚書戶部郎中趙抃刑部郎中陳薦同詳定中  
外封事辛卯告英宗憲文肅武宣孝皇帝謚于天地  
宗廟社稷壬辰上寶冊于福寧殿丙午文州曲水縣

令宇文之邵上書指陳得失八月丁未朔太白晝見  
戊午復西夏和市已巳京師地震癸酉葬英宗于永  
享陵九月丁丑詔減諸路逃田稅額壬午祧僖祖及  
文懿皇后乙酉祔英宗神主于太廟樂曰大英之舞  
戊子減兩京畿內鄭孟州囚罪一等民役山陵者蠲  
其賦辛卯徙封顥為岐王頤為高密郡王富弼為尚  
書左僕射遣孫思恭等報謝于遼且賀生辰正旦壬  
辰錄周世宗從曾孫貽廓為三班奉職甲午遼遣耶  
律好謀等來賀即位戊戌以王安石為翰林學士辛  
丑韓琦罷為司徒鎮安武勝軍節度使判相州吳奎

陳升之罷樞密副使呂公弼為樞密使張方平趙朴  
並參知政事邵亢為樞密副使壬寅以曾公亮為尚  
書左僕射文彥博為司空潮州地震癸卯以權御史  
中丞司馬光為翰林學士冬十月丙午漳泉諸州地  
震丁未富弼罷判河陽戊申建州邵武興化軍地震  
己酉初御邇英閣召侍臣講讀經史以右諫議大夫  
權御史中丞滕甫考諸路監司課績張方平以父憂  
去位庚戌給陝西轉運司度僧牒令糴穀振霜旱州  
縣癸丑詔翰林學士御史中丞侍御史知雜事舉材  
堪御史者各二人詔將作監主簿常秩赴闕甲寅製

資治通鑑序賜司馬光癸酉知青澗城种諤復綏州  
十一月丁丑詔近臣各舉才行可任使者一人戊寅  
詔求直言丙戌詔二府各舉所知丁亥令考課院詳  
定諸州所上縣令治狀戊子分命宰臣祈雪置馬監  
于河東交城縣庚寅詔近臣以舉官不當經三劾者  
中書別奏取旨乙未詔令内外文武官各舉有材德  
行能者十二月丙辰西南龍蕃來貢辛酉以來歲日  
食正旦自己丑避殿減膳罷朝賀壬戌詔起居日增  
轉對官二人丙寅詔州縣吏並緣為姦致獄多瘐死  
歲終會死者多寡以制其罪著為令己巳遼遣蕭傑

等來賀正旦

熙寧元年春正月甲戌朔日有食之詔改元丁丑以  
旱減天下囚罪一等杖以下釋之壬午令州縣掩暴  
骸丁亥命宰臣曾公亮等極言閩失庚寅御殿復膳  
壬辰幸寺觀祈雨丙申趙槩罷知徐州三司使唐介  
參知政事丁酉詔修英宗實錄壬寅增太學生百人  
二月辛亥令諸路每季上雨雪乙卯孔若蒙襲封衍  
聖公壬戌貸河東饑民粟三月庚辰夏主諒祚卒遣  
使來告哀丙戌詔恤刑戊子作太皇太后慶壽宮皇  
太后寶慈宮丁酉簡州木連理潭州雨毛夏四月乙

已詔翰林學士王安石越次入對戊申命宰臣禱雨  
以樞密直學士李參為尚書右丞判西京留守司御  
史臺辛亥同天節群臣及遼使初上壽于紫宸殿五  
月甲戌募饑民補廂軍庚辰詔兩制及國子監舉諸  
王宮學官戊戌廢慶成軍六月癸卯錄唐魏徵狄仁  
傑後丁未占城來貢辛亥詔諸路興水利乙亥河決  
棗彊縣丙寅命司馬光滕甫裁定國用秋七月癸酉  
詔謀殺已傷案問欲舉自首者從謀殺減二等乙亥  
名秦州新築大甘谷口砦曰甘谷城丁丑詔諸路帥  
臣監司及兩制知雜御史已上各舉武勇謀畧三班

使臣二名賜布衣王安國進士及第己卯群臣三表  
請上奉元憲道文武仁孝之號不許陳升之知樞密  
院事給濮州雷澤縣堯陵守戶壬午以恩冀州河決  
賜水死家緝錢及下戶粟甲申京師地震乙酉又震  
大雨辛卯以河朔地大震命公邊安撫司及雄州刺  
史候遼人動息以聞賜壓死者緝錢京師地再震壬  
辰遣御史中丞滕甫知制誥吳充安撫河北癸巳疏  
深州溢水甲午減河北路囚罪一等丁酉賜河北安  
撫司空名誥敕募民入粟己亥回鶻來貢八月壬寅  
詔京東西路存恤河北流民京師地震甲辰又震乙

卯賜河東及鄜延路轉運司空名誥赦募民入粟實  
邊甲子詔中書門下考屬近行等者一人王之丙寅  
罷宗諤平章事丁卯遣張宗益等賀遼主生辰正旦  
九月辛未太祖曾孫舒國公從式進封安定郡王丁  
亥減后妃臣僚薦奏推恩戊子莫州地震有聲如雷  
丁酉詔三司裁定宗室月料嫁娶生日郊禮給賜冬  
十月辛丑給天下繫囚衣食薪炭乙卯出奉宸庫珠  
付河北買馬戊辰禁銷金服飾十一月癸酉太白晝  
見癸未命宰臣禱雪丙戌朝饗太廟遂齋于郊宮廢  
青城後苑丁亥祀天地于圜丘大赦群臣進秩有差

乙未京師及莫州地震十二月己亥朔命宰臣禱雪  
癸卯瀛州地大震庚戌賜夏國主秉常詔許納塞門  
安遠二砦歸其綏州辛亥錄唐段秀實後癸丑禱雪  
于郊廟社稷庚申以判汝州富弼為集禧觀使詔乘  
驛赴闕壬戌雪甲子遼遣耶律公質等來賀正旦  
二年春正月甲午奉安英宗神御于景靈宮英德殿二  
月己亥以富弼同中書門下平章事庚子以王安石  
參知政事命翰林學士呂公著修英宗實錄乙巳帝  
以災變避正殿減膳徹樂甲子陳升之王安石創置  
三司條例議行新法三月乙酉詔漕運鹽鐵等官各

具財用利害以聞丙戌命宰臣禱雨戊子秉常上誓  
表納塞門安遠二砦乞綏州詔許之乙未以旱慮囚  
四月丁酉朔群臣再上尊號不許戊戌省内外土木  
工壬寅遼遣耶律昌等來賀同天節丁未唐介薨臨  
其喪戊申宰臣富弼曾公亮以旱上表待罪詔不允  
癸丑命曾公亮為西京奉安仁宗英宗御容禮儀使  
丁巳遣使諸路察農田水利賦役戊午外任大使臣  
年七十以上令監司體量直除致仕者更不與子孫  
推恩甲子御殿復膳免河北歸業流民夏稅五月辛  
未宴紫宸殿初用樂已卯賜河北役兵特支錢癸未

翰林學士鄭獬罷知杭州宣徽北院使王拱辰罷判應天府知制誥錢公輔罷知江寧府丁亥奉安仁宗英宗御容于會聖宮及應天院甲午減西京囚罪一等台州民延贊等九人年各百歲以上並授本州助教六月丁巳右諫議大夫御史中丞呂誨以論王安石罷知鄆州以翰林學士呂公著為御史中丞命龍圖閣直學士張掞兼編排錄用勲臣子孫壬戌太白晝見秋七月乙丑朔日當食雲陰不見庚午詔御史中丞舉推直官及可兼權御史者甲戌東平郡王允弼薨辛巳立淮浙江湖六路均輸法壬午振恤被水

州軍仍蠲竹木稅及酒課癸未詔自今文臣換右職者須實有謀勇曾著績効即得取旨甲申日下有五色雲己丑韓琦上仁宗實錄曾公亮上英宗實錄八月癸卯侍御史劉琦貶監虔州鹽酒務御史裏行錢顥貶監衢州鹽稅亦以論安石故乙巳殿中侍御史孫昌齡以論新法貶通判蘄州丙午同脩起居注范純仁以言事多忤安石罷同知諫院戊申河徙東行夏國請從舊蕃儀詔許之己酉范純仁知河中府甲寅朝神御殿辛酉以祕書省著作佐郎程顥王子韶並為太子中允權監察御史裏行壬戌侍御史知雜

事劉述同判刑部丁諷坐受刑名敕不即下述貶知  
江州諷貶通判復州審刑院詳議官王師元坐言許  
遵所議刑名不當貶監安州稅九月甲子朔交州來  
貢乙丑以古勿峒効順首領儂智會為右千牛衛大  
將軍丁卯立常平給歛法戊辰出內庫緡錢百萬糴  
河北常平粟丁丑遣孫固等賀遼主生辰正旦辛卯  
廢奉慈廟壬辰以祕書省著作佐郎呂惠卿為太子  
中允崇政殿說書冬十月丙申富弼罷為武寧軍節  
度使判亳州曾公亮陳升之並同中書門下平章事  
城綏州命郭逵選將置守具逵遣趙彥交夏人所納

安遠塞門二砦就定地界夏人渝初盟高請城綏州  
不以易二砦因改名綏德城戊戌以番官禮賓使折  
繼世為忠州刺史左監門衛將軍嵬名山為供備庫  
使仍賜姓名趙懷順丙辰詔御史請對並許直由閣  
門上殿戊午宗諤復平章事己未夏人來謝封冊辛  
酉錄楊承信曾孫立田重進曾孫章為三班借職十  
一月乙丑命韓絳制置三司條例甲戌詔祖宗之後  
世襲補外官非袒免親罷賜名授官丙子罷諸路提  
刑武臣領農田水利約束壬午御邇英閣聽講賜汴  
口役兵錢己丑減天下囚罪一等徒以下釋之閏月

庚子濬御河壬子置交子務是月差官提舉諸路常  
平廣惠倉兼管勾農田水利差役事十二月癸亥朔  
復減后妃公主及臣僚推恩癸酉增失入死罪法丙  
戌增三京留司御史臺國子監及宮觀官以處卿監  
監司知州之老者戊子遼遣蕭惟禧來賀正旦是歲  
交州來貢

本紀卷第十四